

子腥血而死或生男不育生女不長夭折昏
 盲不親日月而死或值雷電霹靂而題脊書
 背誅擊而亡或水没火燒木打石擲土壓冷
 漂而死或夜軍行提刀負弩氣辣力倦勞苦
 而死諸如此等雖為一死而痛各異皆由宿
 命因緣所致隨運而死既壽易衰不以道理
 先身無福不仁之罪身謝三官一旦沈墜幽
 途魂魄各受宿對因請地獄酆都三官六府
 之中懸頭鎖械足立三刀緣刀山循劍樹食
 火啗炭鑊湯所煮炎火所燒吞水飲毒拔舌
 灌口朝答暮押身體毀爛形骸焦燎魂爽酸
 楚痛毒激切已經三掠難得解脫哀哀長夜
 之中榮榮餓鬼之羣愁苦三途之中抱酷五
 苦之庭綿歷數劫罪對不赦希活則生途四
 塞願生則無緣可攀乞死不得長淪罪原永
 乖同泰餘殃不盡引逮後生惡惡相續咎各
 相纏致令愚俗迷否相仍任官不能致祿營
 生不能飽暖男女大小憂苦無泰今為衆生
 上世今世先亡後死首悔斯苦不仁之罪不
 善之愆元逆之過違和負順逆天逆地觸忤

靈神輕犯科法所行不軌罪高山嶽過積海
 淵致使先亡後死不以道理千病萬痛十苦
 百疾毒傷而亡皆先身不仁之對特乞大慈
 賜以矜原隨亡者死時所由絕命之所解脫
 窮魂拔度苦魄得速北酆三官速役去免九
 幽昇上天堂淨鬼之林無為之鄉斷絕復連
 利祐子孫宅合安吉胤嗣完全凶神惡魔不
 得妄忤天覆地載神明護助學道得道求仙
 得仙富貴長保安樂自然於是主人再拜叩
 頭稱受

道恩

太上洞玄靈寶宣戒首悔眾罪保護經卷中

太上洞玄靈寶宣戒首悔眾罪保護經卷下
 太上道君告天師道陵曰此首悔之法昇玄
 品經為道德之籬落是至真之垣牆生死之
 津乘兆庶之橋梁立身之福田功業之淵場
 養性之生途修至真之仙方解罪犯之大法
 修行之首宗極生之上善拔死之第一消災
 之真科散禍之祕術安國之弘教寧家之肅
 約為學之智慧希善之富博治病之良方救
 疾之善藥神明之樞機萬病之扁鵲無上至
 真大道洪範弘敷世教濟度無涯頌之解過
 則千罪水消萬過雪散誦之救死則苦魂冤
 魄永去荼炭解脫五苦超拔八難神登道舍
 淨鬼之林上遊玄都之墟下晏崑閻之場存
 亡俱濟福利日昌誦之求哀則殃流絕逮宿
 咎消滅生者獲福常慶安吉死籍刪除於右
 官生錄注簡於左契於是修經行道長齋苦
 行安神定志丹誠念道歸心無上正真之庭
 宗昇玄內教真經無上統天畢契之錄佩身
 為寶則坐待雲駕超騰太空上謁虛皇道遙
 玉京子當寶秘依法施行建功滅過如響應

聲修善禍自珍建功福自生譬如鑿鏡曲直隨形奉法當盡心敬師當竭誠心盡神明知竭誠至理精如此不懈昇仙克長生叮嚀告萬兆汝當宣是經是經衆法祖無上之至靈供養必得道控雲登玉清妙哉至真文宗者善敬聽

太上道君告天師曰若有賢男子及有善婦女欲修身奉法專心持戒營生求仙好道樂經改心易行返悔過惡丹苦一意至誠無疑欲求長生老壽神仙度世脫災免苦去離患難輪轉善場常與福俱生則安樂死則蟬蛻學道得道白日昇天存止終始齊光日月解脫憂苦常懷歡悅所作過惡皆當悔之悔過之法當盡輪誠一切歸實不當隱蔽蓋子之罪天師唯唯敬受戒言

太上道君告天師曰善男子善女人若欲長為種民保壽延年千載之後身能變化長處神州不遷荒域常在有道之國恒生孝慈之門不墮無德之處不生邊國之鄉去離痛痒與福相傳與善相隨不與禽獸同類不與惡

鬼為隸容姿麗好身無癡癩聰明洞徹慧為智宗者存亡所犯千罪萬過皆當悔之一切歸實不當隱蔽蓋子之罪天師唯唯敬受戒言

太上道君告天師曰善男子善女人若欲治病療疾消災拔命救死護生處世無憂所為即成所願即至宅舍清隱田蠶倍收興生有利為衆所愛長吏所敬子孫昌熾富貴榮顯無不獲吉無不安寧所願從心所念順志修經求道願見真君者所犯過惡皆當悔之悔過之法唯在款實遣情送心必令上聞虛皇道眼自鑿爾心有隱蓋罪道不虛言天師唯唯敬受戒言

太上道君告天師曰善男子善女人若欲知宿世之所在存亡之苦樂欲得知為善得善種福得福樹恩施惠之功補過憶識宿命之所行非及我身覺悟罪福善惡之對知有今身從先身來轉生入死輪死入生因其所因因不絕因緣其所緣緣不絕緣得有今日立我之身憶知此已思建善業唯恐我身更受

後身不得如今而我此身又恐此身後生之所不得明識或失人道不知今身唯恃今身廣作福田能如是者得願如此若欲不復貧窮下賤欲不復孤寡衰微欲不復寒凍飢餓欲不復乞白責賤欲不復災害病患欲不復

耳聾目瞶欲不復癡愚邪見欲不復枉遭縣官欲不復為奴婢侍欲不復讒諛所橫欲長與聖賢相遇欲與明師實經相連欲與真人仙人相逢欲與善人福人德人教訓相值欲令仙道成就者所犯過惡皆當悔之悔過之法皆當丹盡委曲首謝不得藏重首輕蓋子之罪科威嚴峻道不虛言天師唯唯敬受戒言

太上道君告天師曰善男子善女人欲令先世無餘基債暑愆首考宿罪久過欲令今世無相負累初罪新嬰考遠謫負目前深咎欲令三會五祖九玄七世皆使解脫三途悉令遠離五苦欲令後生子孫揚穗大小昌熾四體完具年命壽老處水不寒入火不熱不痛不痒不飢不渴欲令百怪不能駭百禍不能

害龍潛鳳舉出入不可制者所犯過惡皆當悔之悔過之法唯在丹款首謝曲盡則惡無不除過無不原疎慢不恭益子之罪道不虛言子慎之焉天師唯唯敬受戒言

太上道君曰若有君臣父子兄弟夫婦大家奴婢各欲悔過者皆當為師設禮叩頭自搏整身自檢清肅恭敬專心正念奉承教法師當於高座上為講誦首悔之文若於靜室壇堂亦可隨時轉經行道大道無為窈窕冥冥視之不見聽之無聲凡人心至感知人情見不假目聽不假耳故謂神明把握至法制御羣情布教施戒以遺愚民師為首悔其罪即原遂事不改其罪益深人貴能及道貴能微朝過夕改聖人所稱故人作善者為治地也守法戒者為耕犁也布施惠者為植種也悔罪過者為鋤鋤也修清淨者為生榮苗也受經文者猶得雨澤也建齋直者如稼穡滋秀也道德成者猶如收斂也能宣傳法教廣度天人拯拔存亡救恤窮厄治護疾病者猶如開倉施食飯飢飲渴令眾得飽而身自足

無之少也轉經首悔然後獲福亦復如是所謂福田也所謂善業也是以此經此法功德無上國主悔過天災為除賢臣悔過地害為消慈父悔過家無妖怪孝子悔過凶禍為止仁兄悔過家離殃咎順弟悔過門無怨怒廉夫悔過口舌不起貞婦悔過保宜子孫是男悔過和睦家里是女悔過婚姻通理丈夫悔過不之所使奴婢悔過得免驅恥道士悔過三官不羈養性悔過絕穀不危修仙悔過白日登霞為居悔過福覆一家為國悔過九州平和悔過之功其道高重罪福立彰子知不乎天師再拜上白
天尊教戒委備輒請奉宣臣道陵願令天下之人皆得心開意解知為悔過得免其罪故致家國太平安樂長生久壽臣願
天尊當以道力餘哺施與未及者令知作善得善作福得福如種五穀收穫計其利潤百千萬倍諸有未悔者願令奉化諸未昇度者願令濟拔諸未得道者願令登仙諸未應生者願令長延臣之微願因由

天尊若不垂慈來生沈墜為罪造殃恐更日甚今發劣言願重開示
太上道君答天師曰子之所言善哉要乎夫過惡者是凡之務謂世俗之人去聖久遠大化淪薄濁氣淳厚智慧淺木不識禍福謀誤迷惑不自覺知冒罪觸法不知所由故吐經戒以示不悟教之反悔令除過咎也使盲者朗然開明剛強者令反柔弱反凶為吉轉禍為福導之以生津化之以真道而人知不可作故作知不可為故為今日悔明日犯其性不改其惡不止禍至乃閉門罪定方憂恐鎖說方求解縛單方希脫病重方自治臨死方望活悉盡方求益命絕方求續至爾之時天不及護神不能生鬼不能活雖遇聖賢神德之人災不為散病不為療王父不能挺其命王母不能延其壽凡欲建福必在禍先積功累德必未萌之前譬若春種秋望其實臨飢耕田不解於飢臨渴穿井不救卒乏消禍莫若營福積功莫若修身營福修身幸宜殷勤道德之門自開凶惡之戶自塞福起十方殃

滅九陰若無善功植在禍先者則臨命將危
傾財竭產叩頭師門稽首德宇豈得免乎皇
天雖高其聽甚卑凡人身中常有伺過之神
隨時上下白人善惡過滿百二十為一刻刻
者今人多衰少利百八十過為一耗耗者今
人六畜傷損三百六十過為一漏漏者令人
喜發疾病五百四十過為一凶凶者令人瘡
痲龍首一千八十過為一禍禍者令人暴殘
死亡千二百過為一殘殘者出凶逆亂之人
千三百過為一咎咎者令人絕嗣無子千四
百四十過為一臯臯者殃流於五世癩痲大
禍所縛千六百二十過為一謫謫者令人斷
胤無嗣千八百過為一患患者主為奴婢家
內耗亂千九百八十過為一橫橫者家出癩
癩狂癡之子二千一百六十過為一暴暴者
家出反逆父子兄弟自相攻伐出邪巫鬼異
妄說神教二千六百九十過為一災災者家
出骨肉內姓亂勃生育非真三千六百過為
一異異者家出青盲癡殘三千二百四十過
為一變變者家出詔獄死族被誅三千四百

二十過為一怪怪者家出乞丐都市刑人死
不以埋骸骨損棄無人收拾三千六百過為
一刻滿刻滿則定死魂神漂浪隨考輕重付
與三途五苦淪溺備艱辛苦痛毒不可堪忍
訟對生人雖言空虛曠蕩斯則法律孱然今
以告於子子當寶秘宣傳

太上道君又重言曰人生或年二十三而
三刻滿則致凶殘或五十六而三刻滿則
致凶殘年小來有過而殘命者受其先世餘
過也或接行惡逆竟年壽而不遇患者受其
先世餘慶也故積德之後有其餘福積惡之
後有其餘禍故人能悔過者上天鑒之為人
却刻一悔過即為却三刻三悔過即為却九
刻而復後犯不止罪應定死故人欲消災散
暴治病瘵疾當漸以歲月恩愆自責改悔過
罪誠能行之出自至心感激恐怖墮泣流汗
天知至誠地神申信行之一日其人身中伺
過之神為人上除一刻行之百日上除二刻
行之一歲上除三刻行之三年其福自應不
思返悔其過日增其福益深小過止其身大

過流子孫善男子善女人能請經師到宅建
立齋直燒香行道或一日一夕或三日三夕
勤心苦誡日夕六時讀誦此昇玄悔過之文
功德諸天真神降房玄司除刻罪過蒙原積
善如梁上塵積惡如突中煙可不慎哉可不
慎哉天師稽首拜奉行

天師曰無上登天昇玄畢契末受方素契積
年者不得便佩此契慎之

內教無上登天昇玄儀

太上靈寶昇玄內教宣戒首悔眾罪保護生
錄品

無上登天昇玄傳合真之人都統三洞三萬
六千六百六十畢事契令弟子何奉句疑寂
等依科齋信上金九兩白銀十二兩五絲紋
繪五匹信錢二萬四千詣昇玄法師邊奉受
身佩修行積年並有靈應真神三元安鎮丹
田神男玉女侍衛左右法傳應為昇玄內仙
之人某州某縣道士某今太歲某年某月某
日傳道士某觀前已受方素七十二字契盟
並已經年積功著勳無懈諸天所念大

聖所鑒三官死名久以削滅應備上仙昇玄品中依法奉受以為身寶惠舟自引三天為證九地為盟九盟為保神明為任誓不違科犯戒冒法觸律一旦愆失身謝三官死為下鬼長夫人道永充因役明謹無過定仙天府生死得道不羈地官一如靈寶昇玄內教無上登天契之律令

天師曰諸是學仙道士不受首悔之法則罪結無復解時皆當悔過昇玄內教無上尊經燒香供養并佩方素七十二字及無上大籙

修行經年然後能得此無上登天畢契法不傳始學者也若違科犯約則不得便受昇玄弟子首悔之經也兆等受經之身慎之慎之天師曰受此畢券不得妄傳并此經要須奉行精鍊畢訖閑解道意信心無疑欲成其道欲除其過乃以此契及弟子以經付之也若心不達取自我見中心懷疑信此浮好乖彼真實有如此之人必躓地獄下鬼不得便以登天之書傳與流俗行屍之輩故以相告慎之慎之

太上洞玄靈寶宣戒首悔眾罪保護經卷下



上清骨髓靈文鬼律序

陶八

受上清大洞錄行天心正法正錄 有另撰

臣聞書曰天道福善禍淫又曰天命有德天討有罪夫善者必福之淫者必禍之有德則在所命有罪則在所討此天之道也天之臨下豈特明之於人為然哉雖幽之於鬼神其不爾是故神有功於國與民者莫不載之祀典而秩祭之乃若邪怪之鬼物為祟為厲為祲為孽擾民害物者莫不有以治之則其為患可勝計耶此上清骨髓靈文所以俾付正直者使之以奉行也其目有三曰鬼律曰玉格曰行法儀式合而言之通謂之骨髓靈文也鬼律者天曹判判入驅邪院北帝主而行之玉格并行法儀式者玉帝特賜驅邪院以掌判也其要皆所以批斷鬼神罪犯輔正驅邪與民為福為國禦災者焉臣竊見玉格之文尋常法師只以口傳而行法儀式又隱而不論故靈文因此散缺所存者鬼律而已鬼律雖存其俗師不能深曉其意加之傳寫訛謬文理舛錯遂致廢缺只以符水治病多致